

## А Ж Р И М

(Ярашганлик муносабати билан жиноят ишини тугатиш тўғрисида)

2023 йил май ойининг 29 куни жиноят ишлари бўйича Ургут туман судининг очиқ суд мажлиси ўз биносида бўлиб, судья А.Ахмадовнинг раислигида, судья ёрдамчиси Т.Эштайлақовнинг котиблигида, Ургут туман прокурорининг ўринбосари Р.Бахриддинов, судланувчи Ш.Зоитов ва унинг ҳимоячиси “Ҳақиқат ҳуқуқ тарафдори” адвокатлик бюроси адвокати А.Ғаниев ҳамда жабрланувчи У.Бердиевнинг иштирокида, Ўзбекистон Республикаси ЖКнинг 109-моддаси 2-қисми билан айбланган:

Зоитов Шерназар Савлат ўғли(Zoitov SHernazar Savlat o'g'li)-1997 йил 22 ноябрь куни Ургут туманида туғилган, миллати ўзбек, Ўзбекистон Республикаси фуқароси, маълумоти тугалланмаган олий, СамДУнинг жисмоний маъданият факултети 1-босқич талабаси, муқаддам судланмаган, депутат эмас, давлат мукофотлари билан тақдирланмаган, оилали, Ургут тумани “Бешкапа” маҳалласида яшайди, иш бўйича “муносиб хулқ атворда бўлиш тўғрисида тилхат” эҳтиёт чораси қўлланилган, айблов далолатномаси нусхасини 05.05.2023 йилда олганганга

оид 1-1416-2302|176-сонли жиноят ишини кўриб чиқиб, суд қуйидагиларни

## А Н И Қ Л А Д И:

Судланувчи Зоитов Шерназар Савлат ўғли-2023 йил 25 март куни соат 11<sup>30</sup>ларда Ургут тумани “Бешкапа” маҳалласида жойлашган яшаш уйи олдида таниши Бердиев Улаш Қурбоновичнинг ножоиз ҳатти-ҳаракатлари сабабли ўрталарида келиб чиққан ўзаро келишмовчилик оқибатида ўзаро жанжаллашиб, қўллари билан У.Бердиевни юз соҳасида бир неча маротаба қасддан уриб, унга енгил тан жароҳати етказган.

РСТЕИАМСФ Ургут туман суд-тиббий экспертиза бўлинмасининг 2023 йил 20 апрел кунидаги 181-сонли хулосасига кўра, фуқаро У.Бердиевни танасида яъни чап қош соҳасида, чап ёноқ соҳасида, бурун усти соҳасида шилинмалар, иккала кўз қовоқлари соҳасида чап ёноқ соҳасида, бурун усти соҳасида чап томон лунж соҳасида юқори лаб соҳасида қонталашлар ва юмшоқ тўқималарнинг лат ейиши, чап кўз оқиш пардасига қон қуйилиши, бурун суягининг синиши каби тан жароҳатлари мавжуд бўлиб улар ўтмас-қаттиқ жисмлар тасирида етказилган.Бу тан жароҳатларининг одатда кечувида соғлиқнинг олти кундан кўп, йигирма бир кундан бўлган муддатда бузилишига олиб келади. Шунинг учун “ЕНГИЛ СОҒЛИҚНИНГ БУЗИЛИШИГА САБАБ БЎЛГАН ТАН ЖАРОХАТЛАРИ” гурухига киради. Етказилган вақти қарорда статсионар беморнинг тиббий



кارتасида ва текширилувчи шахснинг кўрсатма берган муддатига яни 2023 йил 25 март кунига тўғри келиши мумкинлиги кўрсатилган.

Суд мажлисида жабрланувчи Бердиев Улаш Қурбонович ариза билан мурожаат қилишиб, ҳозирги кунда Ш.Зоитов билан ўзаро ярашиб олишганлигини, судланувчи томонидан унга етказилган моддий ва маънавий зарарлар тўлиқ қопланганлигини, соғлиғи яхши эканлигини, судланувчига нисбатан ҳеч қандай даъвоси йўқлигини билдириб, мазкур жиноят ишини ЖКнинг 66<sup>1</sup>-моддасига кўра ҳаракатдан тугатишни сўради.

Суд мажлисида судланувчи Зоитов Шерназар Савлат ўғли ариза билан мурожаат қилиб, ўз аризасида айбига тўлиқ иқрорлигини, қилмишидан чин кўнгилдан пушаймонлигини, жабрланувчига етказилган моддий ва маънавий зарарни тўлиқ қоплаб, ўзаро ярашиб олганлигини, жабрланувчини унга нисбатан даъвоси йўқлигини билдириб, унга нисбатан юритилган жиноят ишини ЖКнинг 66<sup>1</sup>-моддасига кўра ҳаракатдан тугатишни сўради.

Ўзбекистон Республикаси ЖКнинг 66<sup>1</sup>-моддасида таъкидланишича, Ўзбекистон Республикаси ЖКнинг бир қатор моддаларида, шу жумладан 109-моддаси 2-қисмида кўрсатилган жиноятни содир этган шахс, агар ўз айбига тўлиқ иқрор бўлса, жабрланувчи билан ярашса ҳамда етказилган зарарни бартараф этса, жинойий жавобгарликдан озод этилиши мумкин.

Ўзбекистон Республикаси ЖПКнинг 84-моддаси 4-қисмида жабрланувчи ЖКнинг 66<sup>1</sup>-моддасида назарда тутилган жиноятлар тўғрисидаги ишлар бўйича судланувчи билан ярашган тақдирда жиноят иши ЖПКнинг 62-бобида белгиланган тартибда суд томонидан айблилик ҳақидаги масалани ҳал қилмасдан тугатилиши мумкинлиги кўрсатилган.

Суд, жабрланувчи У.Бердиев ва судланувчи Ш.Зоитовларнинг аризаларини муҳокама қилиб, томонларни фикрини тинглаб қуйидаги асосларга кўра аризаларни қаноатлантиришни лозим топади. Томонлар ярашганлигини, жабрланувчини судга ярашув ҳақида ихтиёрий равишда ариза тақдим этишганлигини, судланувчи томонидан жабрланувчига етказилган моддий зарарлар тўлиқ қопланган бўлиб, уни судланувчига нисбатан даъвоси йўқлигини, судланувчининг айбига тўлиқ иқрорлигини, қилмишидан чин кўнгилдан пушаймонлигини инobatга олган ҳолда Ўзбекистон Республикаси ЖПКнинг 84-моддаси 4-қисмига кўра, судланувчининг жиноят содир этишдаги айблилик масаласини ҳал қилмасдан жиноят ишини Ўзбекистон Республикаси ЖПКнинг 583-моддасига кўра, томонлар ярашганлиги муносабати билан ҳаракатдан тугатишни ва Ш.Зоитовга нисбатан қўлланилган “муносиб ҳулқ атворда бўлиш ҳақидаги тилхат” эҳтиёт чорасини ажрим қонуний кучга киргач бекор қилишликни лозим топади.

Шунингдек, суд, жабрланувчи У.Бердиевга Ўзбекистон Республикаси ЖПКнинг 583-моддаси 5-қисмига асосан ушбу ярашув суд томонидан тасдиқлангандан сўнг, у мазкур иш бўйича иш юритишни қайта тиклаш тўғрисида илтимоснома бериш ҳуқуқини йўқотишини тушунтиришни лозим топади.



Юқоридагиларга биноан ва Ўзбекистон Республикаси ЖКнинг 66<sup>1</sup>-моддаси ва ЖПКнинг 84, 582-583, 585-586-моддаларига асосан, суд

### **А Ж Р И М    Қ И Л Д И :**

Зоитов Шерназар Савлат ўғли (Zoitov SHernazar Savlat o'g'li)га нисбатан Ўзбекистон Республикаси ЖКнинг 109-моддаси 2-қисми билан юритилган жиноят иши, Ўзбекистон Республикаси ЖКнинг 66<sup>1</sup>-моддасига асосан томонларнинг ярашганлиги муносабати билан ҳаракатдан тугатилсин.

Ш.Зоитовга нисбатан қўлланилган “муносиб ҳулқ атворда бўлиш тўғрисида тилхат” эҳтиёт чораси ажрим қонуний кучга киргач бекор қилинсин.

Жабрланувчи У.Бердиевга мазкур иш бўйича иш юритишни қайта тиклаш юзасидан илтимоснома бериш ҳуқуқи йўқолганлиги тушунтирилсин.

Ажримдан норози томон йигирма сутка ичида шу туман суди орқали Самарқанд вилоят судининг жиноят ишлари бўйича судлов ҳайъатининг апелляция инстанциясига хусусий шикоят ёки хусусий протест келтиришга ҳақли.

**Раислик қилувчи судья:**

**А.Ахмадов**

